

El correo gallego

A DO Ribeira Sacra pensa en aumentar a produción de uva

01.09.2009 O Consello Regulador di que precisan un millón de quilos máis para cubrir a demanda

AGN

O presidente do Consello Regulador Ribeira Sacra, José Manuel Rodríguez, recoñeceu en declaracíons á Cadea COPE, que as adegas inscritas no rexistro oficial da denominación de orixe necesitan que a produción de uva, fundamentalmente das variedades tintas, aumente nun millón de quilos para cubrir a demanda comercial que teñen os seus viños.

"Nestes momentos fáltanos un millón de quilos de uvas, porque dos 2,8 millóns de litros que elaboramos coa colleita do ano pasado xa foron vendidos 2,2 millóns. Só quedan nas cubas uns 500.000 litros que, seguramente, serán embotellados para saír ó mercado nos próximos meses", aclarou Rodríguez.

Ó seu xuízo, no éxito comercial que están cultivando os viños da Ribeira Sacra "o más importante é que o produto lle gusta ó consumidor". Rodríguez pensa que é fundamental "facer as cousas ben día a día" e, ainda que non despreza o valor dos premios ou as opinións de expertos catadores en publicacións especializadas, tamén opina que "un 98% da xente non vai comprar un viño porque o diga Parker ou calquera outro".

Desde o seu punto de vista, para apontear o futuro da denominación é imprescindible manter a boa imaxe de marca conseguida, porque "a tarefa de toda unha vida pódese perder con só un ano malo". Con respecto á colleita deste ano, confirmou que a produción será superior á do ano pasado cuns 5 millóns de quilos.